



Concello de Cangas

Expediente núm.: 1583/2019

Procedemento: PERSOAL SALVAMENTO EN PRAIAS 2019 (2º)

Asunto: Publicación bases proceso selectivo 6 socorristas

PUBLICACIÓN: Aprobadas por resolución de Alcaldía de data 26/07/2019 a convocatoria e as bases do proceso de selección de 6 socorristas para o servizo de salvamento en praias de 2019 do Concello de Cangas procédese a súa publicación de acordo co disposto nas mesmas, advertindo que o período de presentación de instancias irá do 29/07/2019 ao 02/08/2019 ambos incluídos:

“BASES PARA A SELECCIÓN DE 6 SOCORRISTAS PARA O SERVIZO DE SALVAMENTO NAS PRAIAS DE 2019 CON PREVISIÓN DE CONFECCIÓN DUN LISTADO DE AGARDA

PRIMEIRA.- OBXECTO, RÉXIME DE CONTRATACIÓN, SISTEMA DE SELECCIÓN E PUBLICIDADE DA CONVOCATORIA

O obxecto das presentes bases é a selección e posterior contratación de 6 socorristas precisos para o servizo de salvamento en praias do Concello de Cangas na tempada de 2019.

A contratación será de carácter laboral e temporal, na modalidade de obra ou servizo para o servizo de salvamento en praias do Concello de Cangas 2019 , cunha duración prevista desde a data da sinatura do contrato e ata o 25/09/2019, en réxime de xornada completa, cun salario bruto mensual segundo a valoración incorporada ao expediente, de de novecentos setenta e catro euros con noventa e nove céntimos (974,99 €).

O persoal seleccionado estará destinado ao servizo de salvamento en praias do Concello de Cangas tendo en conta que entre as súas funcións asume a obriga de efectuar as tarefas de coordinación, enlace e fornecemento de material do servizo de salvamento de praias que lle sexan encomendadas por parte da concellería responsable da área de Turismo.

Os aspirantes seleccionados e os aspirantes que tendo superado o proceso selectivo, e pola nota final non acadasen praza, integrarán un listado que poderá servir para cubrir as necesidades de contratación de socorristas para o Concello de Cangas durante o ano 2019 e as baixas ou renuncias que se puideran producir entre o persoal que si resultase seleccionado.

O sistema de selección será o de oposición.

As presentes bases estarán expostas ao público no taboleiro de anuncios do Concello ata o día da realización do exercicio co fin de posibilitar a presentación de reclamacións ou suxestións as bases, así como na páxina web do Concello de Cangas (www.cangas.gal).

O taboleiro de anuncios da Casa do Concello será igualmente, o medio para dar publicidade a todas as notificacións dos actos que deriven do proceso selectivo iniciado coas presentes bases.

SEGUNDA.- REQUISITOS DOS/DAS ASPIRANTES

Para ser admitido/admitida á realización das probas selectivas os/as aspirantes deberán reunir os seguintes requisitos:

a) Ser cidadán/cidadá español/española ou atoparse dentro do ámbito previsto no artigo 57 do Real decreto lexislativo 5/2015.

Concello de Cangas

Avenida de Castelao, 2, Cangas. 36940 (Pontevedra). Tfno. 986300050. Fax: 986304850



Concello de Cangas

- b) Ter cumpridos dezaseis anos de idade e non ter acadado a idade de xubilación forzosa.
- c) Posuír a capacidade funcional necesaria para o desempeño das tarefas que se van realizar.
- d) Estar en posesión do Título de Graduado Escolar ou equivalente.
- e) Cumprir co disposto no Decreto 104/2012, do 16 de marzo, polo que se fixa a formación mínima dos socorristas acuáticos e se crea e regula o Rexistro Profesional de Socorristas Acuáticos de Galicia na redacción resultante da entrada en vigor do Decreto 35/2017, do 30 de marzo, polo que se modifica o anterior, estando en posesión do carné de socorrista en espazos acuáticos naturais emitido de acordo co citado decreto.
- f) Non ter sido apartado mediante expediente disciplinario do servizo ao Estado, ás comunidades autónomas ou ás entidades locais, nin estar inhabilitado para o exercicio de funcións públicas.
- g) Non atoparse incurso en ningunha causa de incapacidade
- h) Ter satisfeito a taxa por dereitos de exame nos termos establecidos na base cuarta.

TERCEIRA.- SOLICITUDES E PRAZO DE ADMISIÓN DESTAS

Os que desexen tomar parte nas probas selectivas deberán facelo constar no modelo de instancia anexo ás presentes bases dirixida ao Alcalde-Presidente do Concello de Cangas, que deberá ser entregada no Rexistro Xeral, no prazo de cinco días hábiles a contar desde o día seguinte ao da publicación do anuncio da convocatoria na sede electrónica do Concello de Cangas.

Este modelo de instancia inclúe o modelo de declaración polo que se fai constar expresamente o cumprimento dos requisitos establecidos na base segunda, sen prexuízo de que ao final do proceso selectivo se deba acreditar documentalmente ese cumprimento. Non obstante deberá procederse a esta acreditación en calquera momento anterior se así o esixe o Negociado de Persoal do Concello ou o tribunal de selección.

As solicitudes que se presenten a través da oficina de correos deberán entregarse en sobre aberto para ser seladas e datadas polo funcionario de Correos antes de seren certificadas. Caso de que a instancia non se presente directamente no rexistro xeral do concello o/a aspirante deberá dirixir ao enderezo electrónico xuridico@cangas.gal unha copia da instancia con anterioridade ao remate do prazo na que figure a data de presentación no rexistro correspondente, aos efectos de que poida ser incluída na relación de admitidos/admitidas.

Os/as interesados/interesadas presentarán as súas solicitudes sinalando a praza a que aspiran achegadas da seguinte documentación:

- O modelo de instancia que acompaña ás presentes bases debidamente cuberto e asinado.
- Fotocopia simple por ámbalas dúas caras do DNI.
- Fotocopia da titulación académica e específica requirida nas presentes bases.
- Resgardo acreditativo de ter satisfeito as taxas.

Os erros de feito que poidan advertirse poderán subsanarse ou repararse en calquera momento, ben de oficio, ben a instancia de parte.

O Concello poderá requirir en calquera momento a comprobación de estar en posesión dos requisitos da convocatoria establecidos na base anterior e excluír do proceso a calquera aspirante que non reúna ditos requisitos.

CUARTA.- DEREITOS DE EXAME

Será requisito necesario para poder participar na proba selectiva o aboamento dos dereitos de exame dentro do período previsto para a presentación de instancias. Segundo o establecido na ordenanza fiscal municipal correspondente, a cantidade a aboar son oito euros con cincuenta e



Concello de Cangas

dous céntimos (8,52 €) (deberá facerse previa obtención da correspondente folla de liquidación na Tesourería do Concello).

QUINTA.- ADMISIÓN DOS ASPIRANTES

Finalizado o prazo de presentación de instancias, a Presidencia da Corporación aprobará a lista provisional de admitidos/admitidas e excluídos/excluídas, especificando, no seu caso, os motivos da exclusión, o que será exposto no taboleiro de anuncios deste Concello. Os aspirantes excluídos disporán dun prazo de 3 días hábiles contados a partir do seguinte ao da publicación para poder emendar, no seu caso o defecto que motivase a exclusión. No suposto de producirse reclamacións, ditarase nova resolución estimándoas ou desestimándoas o que se fará público, igualmente no taboleiro de anuncios do Concello no prazo de 2 días hábiles do remate do prazo anterior. O feito de figurar incluído na relación de admitidos non prexulga que se lle recoñeza aos interesados a posesión dos requisitos esixidos no proceso selectivo convocado, os cales deberán ser xustificadas documentalmente no suposto de que os aspirantes admitidos superen a proba selectiva.

SEXTA.- TRIBUNAL CUALIFICADOR

O tribunal que xulgará as probas terá por obxecto garantir e supervisar o correcto desenvolvemento do proceso en todas as súas fases. Estará composto por cinco membros. Non poderá constituírse sen a asistencia como mínimo de tres dos seus membros titulares ou suplentes. Os membros titulares e suplentes terán igual ou maior titulación ca esixida aos aspirantes á praza convocada e terán voz e voto.

A composición efectiva do tribunal se fixará na resolución pola que se publique o listado provisional de admitidos e excluídos e a data de exame.

Os/as membros do tribunal deberán absterse de intervir, comunicándolle á Alcaldía cando conorra neles algunha das circunstancias previstas no artigo 23 da Lei 40/2015 de 1 de outubro de Réxime xurídico do sector público.

Así mesmo, os aspirantes, poderán recusar os membros do tribunal cando nestes conorra algunha das circunstancias previstas para elo, de conformidade co establecido no art. 23 e 24 da Lei 40/2015, de 1 de outubro, de réxime xurídico do sector público.

O tribunal poderá contar coa colaboración dos asesores externos que considere oportunos, que actuarán con voz e sen voto, limitándose a prestar a súa colaboración nas súas especialidades técnicas.

O tribunal constituírse con antelación suficiente ao inicio da primeira proba da oposición que se establece nas presentes bases.

SÉTIMA.- SISTEMA DE SELECCIÓN, FORMA DE DESENVOLVEMENTO E SISTEMA DE CUALIFICACIÓN

Os aspirantes no día, hora e lugar para o que fosen citados na resolución pola que se aprobe o listado provisional de admitidos e excluídos serán convocados para a realización da proba práctica da fase de oposición, sendo os sucesivos exercicios fixados mediante acordo do tribunal de selección. Acordo que se publicará na páxina web do Concello e no taboleiro municipal indicando o día, hora e lugar que tivese acordado. As probas da fase de oposición serán as seguintes:

PROBA PRÁCTICA



Concello de Cangas

Os aspirantes serán convocados no día, hora e lugar que acorde o tribunal e que se publicará no taboleiro e na páxina web do Concello para a realización dunha proba práctica, de carácter eliminatorio, previo chamamento único.

Consistirá en correr 200 metros, entrar no mar e nadar unha distancia que será establecida polo tribunal ao inicio da proba en función das circunstancias meteorolóxicas para recoller un moneco de rescate acuático, remolcalo coa técnica adecuada ata a orilla e sacalo da auga ata o punto sinalado polo Tribunal. A proba terá unha puntuación máxima de 90 puntos resultando preciso lograr 45 puntos para non quedar eliminado.

O tribunal antes do comezo da proba estipulará os tempos requiridos, tempo máximo para a execución da proba. A puntuación dependerá do tempo máximo establecido en función das circunstancias meteorolóxicas aplicando as puntuacións proporcionalmente aos tempos obtidos tomando como referencia a do aspirante que obtivera o mellor tempo.

A realización da proba comezará por aqueles aspirantes que teñen como inicial do primeiro apelido a letra escollida conforme ao sorteo realizado previamente polo Tribunal diante dos aspirantes.

O tribunal modificará a posición dos monecos de rescate acuático situados na auga en función da duración da proba e da marea existente.

PROBA DE COÑECEMENTO DA LINGUA GALEGA

De carácter obrigatorio e non eliminatorio e común para ambas categorías (socorristas e patróns). Consistirá na tradución dunha serie de 20 palabras propostas polo tribunal do galego ao castelán ou do castelán ao galego nun tempo máximo de 20 minutos. A proba valorarase de 0 a 10 puntos.

Quedarán exentos da realización deste exercicio os aspirantes que acrediten estar en posesión do certificado en Lingua Galega – nivel 2 (CELGA 2) ou superior, ou a súa validación, ou a certificación do curso de Lingua Galega de Iniciación. Os aspirantes que acheguen dito certificado se puntuarán con 10 puntos. O certificado deberá ser presentado ao tribunal con antelación á realización da proba.

OITAVA.- DESIGNACIÓN DAS PERSOAS APROBADAS

Rematado o proceso de selección o tribunal determinará a cualificación final do proceso que será o resultado de sumar as puntuacións das dúas probas da oposición. No suposto de empate na cualificación final de dous ou máis aspirantes, este resolverase polo tribunal en primeiro lugar atendendo a puntuación na proba práctica, de persistir este facendo unha serie de preguntas adicionais entre os aspirantes empatados en materia de socorrismo e coñecementos sobre o Concello e a ordenanza de praias vixente, de persistir o empate este desfarase por sorteo.

A continuación, o tribunal fará público o resultado do proceso e elevará ao órgano de contratación a correspondente proposta de contratación que inclúa os 6 aspirantes propostos para ser contratados como socorristas.

As persoas propostas serán contratadas sempre que estean en disposición de ser contratadas e que cumpran con todos os requisitos e obrigas establecidos nas presentes bases e na normativa de aplicación.

NOVENA.- LISTA DE AGARDA

O tribunal inclúa na súa proposta dous listados de agarda que estará constituído por todos os

Concello de Cangas



Concello de Cangas

aspirantes que superasen o proceso selectivo e que non obtivesen ou non unha das prazas.

Estes listados servirán para a cobertura de necesidades de contratación de socorristas e patróns durante o ano 2019, ben as que poidan derivarse das renuncias das persoas seleccionadas, ben por novas necesidades de contratación.

As contratacións que se efectúen en base a tal listado deberán facerse mediante a adopción dunha resolución de Alcaldía na que se fundamentará a necesidade de acudir a ela e que contará cos informes preceptivos previos.

A renuncia inxustificada ao contrato suporá a exclusión do listado. A renuncia por causa xustificada deberá acreditarse documentalmente e suporá que se pasará ao seguinte aspirante do listado sen exclusión daquel e sen modificar a súa orde. A imposibilidade de contactar co interesado suporá que se pasará ao seguinte aspirante do listado, se esta imposibilidade se repetise en dúas ocasións igualmente suporá a exclusión da lista. O chamamento efectuarase seguindo a orde do listado aprobado de tal xeito que non se pasará a seguinte persoa do listado en tanto a anterior estea en disposición de traballar. Este chamamento efectuarase telefonicamente, facendo ata dúas tentativas, no teléfono que proporcionarán a tal efecto na súa instancia os aspirantes seleccionados, o teléfono citado poderá ser modificado posteriormente comunicándoo ao Negociado de Persoal. De resultar infrutuosas ambas chamadas pasarase a contactar coa seguinte persoa da lista, coas consecuencias establecidas no parágrafo anterior.

As persoas integrantes da lista deberán presentar a documentación requirida polo Negociado de Persoal para a súa contratación considerando renuncia inxustificada a non presentación da citada documentación no prazo que se lle indique.

Sen prexuízo da titulación e requisitos requiridos para acceder ao presente proceso selectivo as persoas que integran os listados deberán manter en vigor e no seu caso actualizar de acordo coa normativa vixente en cada momento os títulos, tarxetas profesionais e requisitos precisos para poder ser contratados.

DÉCIMA.– INTERPRETACIÓN DAS BASES

As presentes bases vinculan á administración local convocante, ao tribunal cualificador e os/as aspirantes que participen no proceso.

O tribunal cualificador queda facultado durante o desenvolvemento do proceso de selección para resolvelas dúbidas e incidencias a que dea lugar a súa aplicación, podendo adoptar resolucións, criterios e medidas con aqueles aspectos non regulados na presente convocatoria.

DÉCIMO PRIMEIRA.– NORMA FINAL

As presentes bases e cantos actos administrativos deriven destas e das actualizacións do tribunal de selección, poderán ser impugnados nos casos e na forma establecidos pola Lei 39/2015, de 1 de outubro, de procedemento administrativo común das administracións públicas e polo disposto nas presentes bases.

Así mesmo a administración municipal poderá, no seu caso, proceder á revisión das resolucións dos tribunais conforme ó previsto na devandita Lei 39/2015, de 1 de outubro, de procedemento administrativo común das administracións públicas.

ANEXO

INSTANCIA PARA PARTICIPAR NO PROCESO SELECTIVO PARA CUBRIR 6

Concello de Cangas

Avenida de Castelao, 2, Cangas. 36940 (Pontevedra). Tfno. 986300050. Fax: 986304850



Concello de Cangas

PRAZAS DE SOCORRISTAS DO SERVIZO DE SALVAMENTO EN PRAIAS DO ANO 2019, 2ª CONVOCATORIA.

APELIDOS, NOME:

TELÉFONO:

DNI:

ENDEREZO:

ENDEREZO ELECTRÓNICO:

Solicita ser incluído na relación de aspirantes admitidos no proceso selectivo de socorristas para o ano 2019 convocado polo Concello de Cangas.

Por medio do presente declara que non se atopa incurso/a en ningunha causa de incompatibilidade ou incapacidade que determine a lexislación vixente e que cumpre tódolos requisitos esixidos na convocatoria (en particular os expostos na base segunda) e que non foi separado/a mediante expediente disciplinario do servizo de calquera das administracións públicas, nin atoparse inhabilitado para o exercicio das funcións públicas.

Cangas, de de 2019

Asdo. :

DOCUMENTACIÓN A PRESENTAR XUNTO Á PRESENTE SOLICITUDE:

- A presente instancia, debidamente **cuberta e asinada**.
- Fotocopia do D.N.I.
- Fotocopia da titulación esixida (académica e específica).
- Xustificante acreditativo do pago das taxas.
- No seu caso, documentación acreditativa do coñecemento da lingua galega.”

O que se publica aos efectos oportunos

DOCUMENTO ASINADO DIXITALMENTE AO MARXE

Concello de Cangas

Avenida de Castelao, 2, Cangas. 36940 (Pontevedra). Tfno. 986300050. Fax: 986304850